

後山集

冊三

後山先生集卷第十五

表 啓 祭文

代謝西川提點刑獄表

惟蜀中之右地乃海內之上游家有刑書知而不犯地爲沃野富以無求圉
屢空枹鼓幾困乂安周召之化寢成齊魯之風延見吏民間所疾苦諭以寬大
之意使無鞭扑之憂觀其歡欣見於眉宇無以爲報莫知所言

中謝

伏念臣賦命

數奇與人寡合以記誦之學起畎畝之中以刀筆之能供州縣之役居無邑里
之譽孰爲先後之容況茲罪戾之餘宜在棄捐之數因緣過聽蒙被誤恩備員
理官久出衆人之後奉使詔獄再爲萬里之行明大義以決疑無儒者之效奉
三尺以從事有俗吏之譏自知甚明人望何在豈期幸會復與選中用過其能
思非所望此蓋伏遇皇帝陛下以神明之德當制作之期樂與諸臣慎守成法
明揚不次之位期致非常之人顧

臣

之愚何以爲報謹當竭犬馬之力收桑榆

之功明慎庶刑慰安遠俗以身許國不知蜀道之難視日近人信有長安之遠

代賀興龍節表

四序運而歲成爲地之統萬物備而聖作得天之時敢忘事上之恭竊有增高之意恭惟皇帝陛下當天受命繼聖承家性成堯舜之仁躬行曾閔之孝鑒觀前載考古義以御今退託未明順下風而問道方大冬之協律仍千載之膺期日月清明光氣充塞庶邦有衆願效忠臣之心萬年無疆請祝聖人之壽臣蒞官有守稱慶不遑永懷盛禮之行更覺長安之遠

代謝賜曆日表

敬授民時永惟王事之本欽崇天道以協陰陽之和凡爾有邦共承大賜恭惟太皇太后陛下以神明之德成天地之能盡萬物同其仁與四時合其信迎日推策極天地之至精敘事授方修治朝之故事臣敢不以時宣政因歲考功庶寬水旱之憂少逭簡書之責

代謝夔路提點刑獄表

三巴之險雖天下之畏途一道之權乃士倫之高選衆之所慕私以爲憂中竊

謝

以遠之則怨人之常情寵至而憂士之深慮粗識事君之義豈敢辭難熟聞長者之言不能無懼然臣忠有餘而智短心益壯而力殫顧貪寵榮何以稱報重念臣術學無以應敵容貌不足動人早以一經誤當公選晚緣再黜幾失明時雖已往之莫追冀方來之可補伏遇太皇太后陛下用地之道因天而行刑賞交修功過並用稍寬罪戾復在憫憐取其一日之長付以百城之寄謹當益堅故意以濟暮年志輕萬里之行身驅九折之險宣昭聖人之化期於無刑輸竭老馬之能託於不朽

代謝賜恤刑表

皇心隱惻念及庶方天詔丁寧形於一札伏讀感歎至於再三

謝中

夫以克謹常

刑聞之在昔著爲故事方自本朝每於炎燠之時屢下寬大之詔輝光四燭圉圉一空人自不冤刑由是措伏惟皇帝陛下以不忍之心而行不忍之政當非常之事而有非常之功燕處清閒不忘三木之被體功施動植尙懼一夫之向隅誠意所加孰不感動德澤之下無復過差雖奉累聖之成規實自一時之至

意臣職親訟獄恭奉德音實與吏民同深慶忭

代賀冊皇后表

爰歷靈辰肇脩內職禮成一代風動四方賀中臣聞朝廷之治本乎家婚姻之道

正乎始爰求茂族用配哲人龜筮協從人神同福恭惟太皇太后陛下憂深廟社謀及子孫既成天德之剛復修陰禮之助本支百世寢被周南之風壽考萬年膺受天下之養臣職當守土世受懋恩欣聞大禮之行莫預外庭之賀

代謝曆日表

君以民爲心既同其樂人以食爲命必謹其時爰舉舊章以興嗣歲中謝恭惟皇

帝陛下聰明好學制作順民生資堯舜之仁躬行曾閔之孝與天同德固無先後之違繼古成能宜有始終之合臣謹當布昭寬大勸省事功使無凍餓之憂庶有涓埃之助

代賀正表

行夏之時正得三元之會祝堯之壽願同萬國之心賀中伏惟皇帝陛下勇智自

天光文協帝仁而博施盡日月之照臨聖而不居究古今之治亂徒見成功之速莫知藏用之微臣祇領郡章親逢聖旦建四三王之禮更深缺二之嗟舉千萬歲之觴徒切封人之意

代賀安西川表

奉清廟之遺策還職方之故區恩賞並行人神共慶中賀竊以繼志述事孝之大

原取亂侮亡古之常道既重譯之來享而小醜之弗賓金鼓一鳴山石四缺一

斷匈奴之臂告成太平之功藏邾支之頭永爲夷狄之戒伏惟皇帝陛下勤於堯禹英類祖宗仁政而有勇功文德以立武事表四郊之道不無萬里之行舉外廷之觴更上億年之壽

代賀生皇子表

甲觀告寧天爲百瑞恩言周布歡動四方中賀臣聞聖則多男人之所祝冠而生

自古以爲祥恭遇昌期宜有昭報上以慰兩宮之念下以爲萬世之基凡在寰區舉興善頌伏惟皇帝陛下聖神文武睿哲溫恭以天縱生知之資務日就默

識之學內修法度煥然一代之文外服戎夷終見兩階之舞承列聖之丕緒方懷燕翼之思以百姓而爲心宜有子孫之福益著思齋之聖更形旣醉之詩十月而堯已同德之兆千萬歲而壽武願同庶物之心

代賀生皇子表

吉月令辰是生元嗣榮光休氣昭示聖期天地合符華夷交慶

中賀

臣聞王者之

孝以繼體爲先人子之心以順親爲樂惟時盛旦顯有體符

缺四字

將主七廟之

器抱孫弄稚祈奉兩宮之歡伏惟皇帝陛下以天爲心視民猶子三刑設而未用五兵儲而不陳鳥獸蟲魚咸得其所山川鬼神亦莫不寧故得萬物之歡心而獲百順之顯福國勢定而加重人心安而益舒四海同聲豈特封人之祝三靈效祉不待高禋之求建昭代之盛儀弗從故事第從臣之嘉頌莫效微材

代賀冊皇后表

龜筮協從古今同貫盛儀旣舉休氣來臨臣

中賀

竊以三后興邦必有同心之助

六朝成憲著聞積德之升惟關雎左右之求有思齊十百之報人有所仰邦其

永昌恭惟皇帝陛下既聖不居持成如始考圖數貢盡雨露之所濡緯地經天直陰陽之備位爰因誕聖遂建洪名德配二宗並有照臨之意功施四海居無怨曠之聲豈意暮年數逢盛事

代賀冊皇后表

功德兼茂禮命載崇慶自宮闈逮於寰海臣某

中賀

竊惟母以子貴既三代之舊

章位以次升乃六廟之盛德惟紫庭之虛位更寶曆之累年雖聖念退抑以未遑而天下屬望之有在嗣既自出天猶不違爰歷靈辰茂膺大典恭惟皇帝陛下寅畏天地弘法祖宗以義勝私出入詩書之府由今望古度越周召之風爰興舉於盛儀用光華於聖旦室家胥慶日月增明萬物順成氣得陰陽之備三靈錫羨壽有岡陵之崇

代謝西川提點刑獄啓

祇奉誤恩至承重寄榮生意外媿見顏閒方國家有爲之時乃賢智自效之日凡在選掄之數與有太平之功惟茲庸蜀之郊限以河山之阻遠人異俗未知

勸禁之方下吏淺聞莫諭天人之際宜得一時之士以爲百吏之師如某少則賤貧古之愚直記誦之學豈有異聞刀筆之材未堪大用奉使五嶺才有去來之勞備員中部徒歷歲時之久勤不補拙明過其情方虞譴訶敢意僥倖此蓋伏遇某官人非求備物使得宜勞其萬里之行付以百城之寄驚駘已老未忘卑樞之恩鷄鵠何知不識鼓鐘之樂

謝徐州教授啓

四月二十八日蒙恩授亳州司戶參軍充徐州教授者誤膺公舉所譽至情伏讀訓詞以榮爲懼惟士之於世如女之從人必待禮而後行將正身以及國唐虞在上無自獻之八元魯衛之閒有歷聘之一老雖用捨之有在乃天命之適然苟非其人則爲亂俗若師道少則不敏老而無聞竊懷匹夫不奪之心庶幾君子難進之節是古之學勤而無功自好之文華而不實然賤而多藝乃孔子之不爲雖窮則益堅持文王而後作旣所長之無取敢有意於多求豈惟天幸之來辱在薦賢之數起於徒步召以師儒慄股汗顏不勝愧畏爝火不息幸依

日月之光馬羣旣空遂及駑駘之輩再念師道羈孤百出度越千生方寄食於游從期轉死於溝壑母子不保更懷喜懼之心夫婦相望限以河山之阻惟茲五斗之祿足爲十口之生追還妻孥收合魂魄扶老攜幼稍比於人飽食煖衣少緩其死捧檄以喜知毛義之有親倒道而行顧主偃之已老此蓋某官仁而徧愛明以有容爲國求才與人同樂顧羣能之畢用憫一夫之向隅方施咳唾之餘已戴邱山之重德無以報徒懷犬馬之心命苟乘時願效鉛刀之用

謝再授徐州教授啓

中臺絕望邈加天漢之光孤宦易危慄若秋霜之肅方去留之未定顧聲聞之不遑逮此踰時復伸故意昨緣如舊出守東南念一代之數人而百年之幾見閒以重江之阻莫期再歲之逢使一有於先顛爲兩塗之後悔又謂中山之相仁於放麇亂世之雄疑於食子惟其信之旣篤所以行之不疑豈意妄傳遂煩公議方衆言之成市雖百虎而可疑賴日月之並明而仁人之在上深知曲折公賜保全憐其母子之窮還以斗升之祿原恩有自攬涕無從願爲執鞭喜有

逢於晏子期之異日報不後於

文缺

答諸先輩啓

伏審先輩與賢

字缺二

待問明庭深推災異之原論著古今之效惟義所在可舉

而行歷皇覽以興嗟褒嘉言而賜第魁梧奇偉究見忠臣之心深切著明更觀
儒者之效惟此得人之盛莫居吾黨之先作者七人遂空冀北之野傳之千載
復聞泗上之風辱在游居與有光寵既竊

字缺二

之自又當盛禮之臨感服無忘

敷陳未既

代答馬狀元啓

狀元先輩祇承明問顯效至忠拳拳有愛君之心亶亶明當世之務遂更帝覽
明被官思擅一代之風聲聳四方之觀聽諫而見信寧懷小祿之私言之非難
更成大儒之效豈期厚貺先辱吉音向德之心非書可既

代賀門下蘇侍郎啓

顯膺明制登進東臺賢能所居位望加重成命四達衆言一同竊以帝者不難

於待任而難於知人君子不患乎富貴而患乎所立上之爲賢而下不異明之
所善而實與同故邪正不亂而用究其能終始如一而人不失望不有君臣之
合孰明治亂之分恭惟某官行法於身成言於德名在三君之列行爲萬世之
師方其在布衣之中已有經天下之志對嘉祐之問則刺切明主議熙寧之法
則違逆權臣人之所難行而甚易事之未效職其當然故身雖窮於江湖而望
已在於廊廟遂膺大用顯有不功人欲未充

此有缺文

非年而化已如漢相之言三

揖而升遂正商衡之任某繫官汝潁阻賀庭門實與斯民不勝至願

賀兵部蘇尙書啓

入侍邇英出司武部成命一下歡聲四來竊惟八座之崇以待二府之選章帝
之眷郅壽豈惟詞藝之工文宗之用贊皇亦爲登進之漸昔存故事號爲美談
尙書侍讀以俎豆多聞爲軍旅之事以道德之老備師傅之官偃革修文尙須
伯益之贊拜章歸道益隆桓氏之風遂挽洪鈞以綏四海周登魯衛深爲政事
之同晉用崔溫或爲前後之繼公望如此私心與同致慶以還執事而候

代答南京留守巫待制啓

試守東州初無善狀奉使西道信有誤恩被聖訓之丁寧奉明詔之寬大惟此
入州之衆洊更連歲之凶視凋瘵以興嗟顧闕迂而無術莫寬愛願徒積兢慚
留守待制學以明家行爲世法隱然天下之望蔚爲君子之儒比事屬詞名出
漢廷之右愛民憂國政居良吏之前方此有行未遑致問不圖貶損遽辱褒嘉
喜懼不勝筆舌難盡

賀亳州何侍郎啓

移節近藩歷辰授職封疆相錯民素熟於寬仁條教旣頒吏究知於深厚風聲
四出耳目一新恭惟知府郎中國之老成人之師表聰明好古博極天下之書
簡易無華洞是胸中之美詩高而無上語少而中微好士得古人之風和而有
別爲政無當時之譽去則見思恐坐席之未溫卽鋒車而賜召相候旬日復見
富民之稱壽考百年益隆洪興之德某登門未久辱顧已深豈期三折之餘復
失二天之庇臨書惆悵徒切傾瞻

代賀鄆州呂侍郎啓

祇奉皇俞併伸顯命復宗途之故步分將鉞之新威凡在庇庥舉深欣幸伏惟某官百年華胄一代偉人政事蔚乎無前文武惟其所用公忠亮直綽有先進之風愷悌清明簡在名臣之數既踐更於中外益昭著於聲猷果當新政之先重委東方之寄恐坐席之未暖卽追鋒而賜還輿望所同濡筆以俟薰風戒候視政攸勤望爲廟朝更加調護

謝正字啓

帝者居尊舉要因任以責成

缺二字

爲官擇人作新以續故必須養之有素然後

求人非難恭惟祖宗之遠猷創爲館閣之清選由二府之共舉開數路以博收不爲常員務在多得給太官之上膳假四部之異書加以其年孰不爲用凡百年名世之士莫不由是以興而一代致平之功其原蓋出於此名雖文學之選實爲將相之儲尤難其人可稱此舉如某材非適用實不迨名徒以生逢文武之興夙被父師之訓粗於翰墨小有專勤誤蒙哲匠之詳隨在勝流之數每深

惟於弱質久自絕於仕途本願下鄉歿有善人之號豈期暮齒名玷薦賢之中粗蒙一命之微已致七年之廢方睿聖之有作而公道之大行乃於斯時復與此選頭童齒豁敢辭乳媪之譏聞淺見輕但畏金根之謬顧惟忝冒有愧情顏此蓋伏遇某官樂育英才修明前政以水鑑之平而邪正洞照以湖海之量而細大畢收憐其衰殘借以光寵老馬伏櫪不忘萬里之行弱羽衝風敢期百發之中感幸之至但切下情

謝胡運使啓

爲吏經年以身待察旣免譴逐復加薦論顧無一日之長猶有二天之覆當善而懼豈人所能竊惟甚愚莫宜於世一從底仕皆異所聞閉門自守則人以爲高事上盡禮則衆目其異動而得謗語輒忤人顧一世之數奇辱衆人之譏笑自省如所人謂斯何此蓋伏遇運使大夫以高世之能當東方之寄乃倉廩空虛之後而水旱流亡之餘召和氣以致祥收人材以報國謂拔十得五而可得其半故匿瑕含垢而以求其長致此下愚乃有至聽施而無報見君子之用心

得於不求全匹夫之素志謹當勉以不逮行其所知庶及後車之塵無累知人之目

賀人及第

試藝中程造庭賜服永作鄉閭之觀豈特交游之光某欽承不遺先辱貽問其爲感幸莫盡意言

代祭曹令文

嗚呼我昔與子同僚共好無從不鞭有美必詔畫而同遊夜則更造忘形脫俗肝膽相照來必解帶寒必著帽逐涼負火一飯百饑鳥鳴於春秋魚可釣車馳卒奔兩使交道討論古今攻堅接要是是非非窮極至到有無卻辱焦口燦貌落筆抵几又驚以笑閒以五字有唱斯報駸駸逸足度謝超鮑我以喪歸子復來弔哀我病老且拊且膏有求弗厭無得不效以子之故煙不絕竈謂子之賢宜顯宜耄如何不良一病不療過我而北曾不我告舟人有云追不及旄一觴千里寄此號叫情耶文耶孰得而料

代春祭羣神祝文

春祈秋報國有常典爰歷靈辰敬供祀事風雨時至百穀順成惟神之休民之望也

代春祭羣神祝文

天災時行雨雪爲虐上憂勞東方爰下赦令施德宥罪以當天心復詔守臣致命羣祀神其鑒之有當上意也

代郭氏焚黃文

故事天子祀享天地同休諸臣施及存沒某年以散郎竊位於朝與有追榮之典自衛尉少卿中大夫三告子弟其所以褒郭氏之意甚寵既藏於家又焚其副書以追錫於地下則天子孝治之道亦已至矣顧惟不似何以及此惟是先大夫之餘休遺澤積厚流長故能生享其祿歿受其報則天之報施善人不爲不至也故敢以告

鄉人祭張殿直文